

Headlines

1. उपराज्यपाल मनोज सिन्हा होरें अज्ज स्कॉस्ट जम्मू च त्रै रोजा कृषि सम्मेलन ते करसान मेले दा उद्घाटन कीता, विकसित भारत ते आत्मनिर्भर जम्मू-कश्मीर लेई राई-बाई सभनें शा पैहले पालसी पर लो पाई।
2. मुखमंत्री उमर अब्दुल्ला हुं'दे आसेआ अपने कल्लै दे बयान पर माफी मंगने दे बाद सदन दी कार्रवाई परतियै ब्हाल।
3. मुखमंत्री होरें अज्ज विधानसभा च जम्मू-कश्मीर सिविल कोर्ट तरमीमी बिल पेश कीता।
4. सरकार दा आखना ऐ कि मिशन युवा पर व्यापक ते सकारात्मक प्रतिक्रिया दिक्खने गी लब्बै करदी ऐ, जम्मू-कश्मीर च 1 लक्ख 71 ज्हार नौजोआनें अपने नांऽ एह्दे च दर्ज कराए न।
5. 23 फरवरी थमां गुलमर्ग 6मीं खेलो इंडिया सयालु खेड्डें दे दुए गेड़ दी मेजबानी करने जा'रदा ऐ।

<><><><><><>

LG-Kisan Mela

उपराज्यपाल मनोज सिन्हा होरें अज्ज स्कॉस्ट जम्मू च त्रै रोजा राई-बाई सरबन्धी सम्मेलन ते किसान मेले दा उद्घाटन कीता। इस मौके पर किट्टु गी संबोधत करदे होई उपराज्यपाल होरें आखेआ जे राई-बाई ते एह्दे कन्नै जुड़े दे क्षेत्र विकासशील मुल्लखें लेई बीमा आह्ला लेखा न। उनें आखेआ जे सभ्यता दा भविक्ख राए गेदे हर बीऽ पर निर्भर करदा ऐ। उनें जोर देइयै आखेआ जे राईबाई आह्ला क्षेत्र राश्ट्र दी प्रगति ते मनुक्खता दे कल्याण लेई बड़ा महत्व रखदा ऐ। उपराज्यपाल होरें आखेआ जे राई-बाई पैहले आहली नीति विकसित भारत ते आत्मनिर्भर जम्मू-कश्मीर यकीनी बनाग, बशक्क कियां दी बी चुनौतियां की नेई आई जान। इस मौके पर राईबाई मंत्री जावेद अहमद डार होर बी मौजूद हे।

<><><><><><>

CM-Apology

मुख्यमंत्री उमर अब्दुल्ला होरें विधानसभा च कीती गेदी अपनी टिप्पणी पर पछतावा जाहिर कीता। उनें आखेआ जे उंदा मकसद कसै गी दुखी करना नेई हा। उनें साफ कीता जे उं'दी टिप्पणी बीजेपी नेताएं दे परौआर आहलें प्रति नेई ही। एहू बयान बीजेपी विधायकें आसेआ उमर हुं'दी कीती गेदी टिप्पणी पर बरोध करने ते माफी दी मंग मगरा आया।

एहूदे थमां पैहले विधायकें उमर अब्दुल्ला हुं'दे आसेआ कीती गेदी टिप्पणी गी गलत ते सदन च इस्तेमा नेई कीते जाने आहली भाशा दस्सदे होई विधानसभा थमां बाँकआउट कीता हा।

<><><><><><>

CM-Bill

मुख्यमंत्री उमर अब्दुल्ला होरें अज्ज विधानसभा च जम्मू-कश्मीर सिविल कोर्ट तरमीमी बिल 2026 पेश करने दी घोशणा कीती जेहदा उद्देश्य मुंसिफ ते मतैहत जज यानि सबार्डिनेट जज दे औहूदे दा नां बदलियै सिविल जज जूनियन डिविजन ते सिविल जज सीनियर डिविजन करना ऐ। एहू बदलाव जम्मू-कश्मीर दिएं अदालतें दे नाएं गी मुल्बै दे होरनें राज्यें ते केंद्र शासित प्रदेशें आडर बनाने दे मकसद कन्नै कीता जा'रदा ऐ। इस बिल गी अधिकारी गजट दे इक विशेष गैर ममूली संस्करण च प्रकाशित करी दिता गेदा ऐ।

<><><><><><>

CM-Digitization

मुख्यमंत्री उमर अब्दुल्ला होरें अज्ज विधानसभा गी भरोसा दोआया ऐ जे जमीनें दे रिकार्ड दा पूरी चाल्ली डिजिटलीकरण करने थमां पैहले उंदी जांच करोग ते इस गल्ला दी तस्दीक करोग जे प्रक्रिया च कोई कमी खामी नेई ऐ। प्रश्नकाल दरान उनें आखेआ जे इस प्रक्रिया च गलती होई सकदी ऐ ते लोकें थमां इस बारै शकैतां थहोइयां न जे किश एंटीज गलत ना। मुख्यमंत्री होरें आखेआ जे मैहकमे गी हिदायत कीती गेई ऐ जे प्रक्रिया लेई कोइ, समें सीमा नेई ऐ ते नां गै कोई दवा ऐ, तौले खत्म करने दा। इस करी तेजिया कन्नै कम्म सबूरा करने दे बजाय तरजीह स्हेई चाल्ली कम्म करने दी देनी लोडचदी। उनें आखेआ जे सरकार विधायकें थमां सुझा लैग ते सारे जायज मसलें दा हल करोग।

8th Pay Commission

जम्मू-कश्मीर सरकारै 8में तनखाह कमीशन दे सरबंघै च अज्ज केंद्र शासित प्रदेश सतह पर इक नोडल अफसर गी नामजद कीता ऐ। आम प्रशासनिक विभाग आसेआ जारी अधिकारिक हुकमै मुजब खजाना मैहकमे दे प्रशासनिक सचिव गी इस भूमिका लेई चुनेआ गेआ ऐ। एहू अधिकारी भारत सरकार दे वित्त मंत्रालय दे अखराजात सरबंघी मैहकमे कन्नै संपर्क ते तालमेल रक्खोग ते 8में तनखाह कमीशन गी लागू करने सरबंघी सिफारिशें बारै विचार बटांदरा करोगं आम प्रशासनिक विभाग आसेआ एहू हुकम जम्मू-कश्मीर सरकार दे इख्तयार तैहत जारी कीता गेआ ऐ।



Mission Yuva

जम्मू-कश्मीर सरकार नै अज्ज विधान सभा गी जानकारी दिती ऐ जे मिशन “युवा” च पूरे खिते दे युवाएं दी बेमिसाल भागीदारी दिक्खने गी लब्बी ऐ। इसदे शुरु होने दे बाद थमां लेइयै अज्ज तक्कर 1 इशारिया 7-1 लक्ख शा मते युवाएं मिशन “युवा” प्लेटफार्म उप्पर पंजीकरण कीता ऐ ते तकरीबन 70 ज्हार औपचारिक उद्यम आवेदन हासल होए न। उपमुख्यमंत्री सुरिंद्र चौधरी होरें आखेया जे एहू प्रतिक्रिया इस कार्यक्रम उप्पर युवाएं दे बधदे भरोसे गी दर्शादी ऐ- जेहदा मकसद जम्मू-कश्मीर दे युवाएं च उद्यमिता- स्वरोजगार ते हुनर विकास गी बढ़ावा देना ऐ।



Literary Conference

मातृभाशा उत्सव दे सिलसिले च जम्मू च त्रै रोजा साहित्यिक सममेलन अदबी मर्कज कामराज दा सरिस्ता कीता गेदा ऐ जेहदा उद्घाटन कल जम्मू-कश्मीर विधानसभा दे स्पीकर अब्दुल रहीम राथर होरें कीता हा। इस सम्मेलन दा मकसद नौजोआनें गी मातृभाशा यानि मां बोली दे महत्व गी जानने ते समझने लेई प्रेरित करदे होई क्षेत्रीय भाशाएं गी बढ़ावा देना ऐ। इस आयोजन च क्षेत्रीय भाशाएं दे लखारी, कवि, विद्वान ते संस्कृति कला ते साहित्य कन्नै जुडी दियां हस्तियां बी हिस्सा लै करदियां न जेहड़े परिचर्चाएं, कवि गोष्ठिएं ते बिचार बटांदरे आहले गेडें च बधी चढियै हिस्सा लै करदे न। इस दरान टकोहदा करियै मां बोलिएं दे सम्मान, संरक्षण ते इनेंगी बढ़ावा देने पर मता ध्यान दिता जा'रदा ऐ।

SHG-Samba

साम्बा जिले दे नड ब्लॉक च आप सहायता समूह दी महिलाएं घरें च खुम्बें दी खेती करिए आमदन कमा'रदियां ना। राई-बाई मैहकमे आसेआ J.K.C.I.P तैह्त 2500 खुम्बें दे bag महिलाएं गी दित्ते गए न जिंदी कीमत 3 लक्ख रपे ऐ। एहू थैले महिलाएं गी 50 फीसद रियायती भाएं पर हासल होए ना। साम्बा दे जिला राई-बाई अधिकारी डॉ. राकेश खजुरिया होरें आखेआ जे एहू दिक्खिए खरा लगा'रदा ऐ जे महिला खुम्बें दी खेती च बेहतर करा'रदियां ना।



Udh. Bharat Darshan

सिक्कि एक्शन प्रोग्राम तैह्त जम्मू-कश्मीर पुलस आसेआ जिले दे 87 युवाएं गी 5 दिनें दे भारत दर्शन टूर लेई भेजेआ गेआ। उधमपुर रियासी रेंज ते डी.आई.जी सराह रिज्वी ते एस.एस.पी अमोद नागपुरे होरें जिला पुलस लाइन उधमपुर थमां इस दल गी झंडी दस्सियै रवाना कीता। एहू दल दिल्ली ते बेंगलुरू दा दौरा करोग ते महत्वपूर्ण थाहें दा दौरा करोग। इस दौरे दा मकसद राश्ट्री एकता गी बढ़ावा देना ते दूर-दरेडे इलाकें दे बच्चें च आत्मविश्वास बदाना ते उ'नेंगी प्रेरित करना ऐ।



KIWG Gulmarg

गुलमर्ग 23 थमां 26 फरवरी 2026 तक्कर होने आहले 6में "खेलो इंडिया" स्यालु खेड्डें दे दुए चरण दी मेजबानी करने लेई त्यार ऐ। जे एंड के स्पोर्ट्स काउंसल दे सैक्रेटरी Nuzhal Gul हो'रें सोशल मीडिया पर इक पोस्ट च आखेया जे खेलो इंडिया विंटर गेम्स भारत दे बेहतरिन स्यालु खेड्डें दे एथलीटें गी इकट्ठा करोग जे ओ बर्फू च अपनी खेड्डे ते हुनर दा प्रदर्शन करी सकन। इनें स्यालु खेड्डें च SKI Mountaineering, Alpine Skiing, Show boarding ते Nordic Skiing खेड्डां होगन। इस संस्करण दा पैहला चैरण 20 थमां 26 जनवरी तक्कर लद्दाख ते लेह च दो खेड्डें आइस हॉकी-आइस स्केटिंग कन्नै शुरु होआ हा।

